

So475

Regd.No.19134/88

<http://www.kbc.org.in>

NAI/220/99

No-G-4/Regd.Magazine/KBCThuso/MNP-81



KBC|THUSO

Kum 55 Ihinna

Ollha/December 2018



JANUARY EVENTS :Annual Audit - 10-12 | Sunday School Teachers Training - 21-24 | General Assembly - 28-31

"Kapa theng, eini pumkhat ihi bang a amaho jong
pumkhat ahitheina ding un, Nangman amahohi hong in"

John. 17:11



KBC DIAMOND JUBILEE KIMAN NA
15 November 2018

CONTENTS

THUMAKAI HO

1. Editorial/Kipah a kilemto na	1
2. Thuchu Tahsaphe /Rev.Henjalen Doungel	3
3. Bethlehem Khopi neocha/Rev. Letpu Kipgen	6
4. Huhhingpu penna dinga/Lhingjanem Haokip	8
5. Christa hoija pengding ham?/Pastor Haoneo	10
6. Phat kikhel leh Christian Hinkho/Rev. Onthang Haokip	13
7. Mission Column	16
8. Youth Column	19
10. Education Column	22
11. Literature Column	23
12. Report	25

EDITORIAL BOARD

Chairman	: Rev. Dr. Hawlngam Haokip, President KBC
Editor	: Dr. M. Thongkhosei Haokip, General Secretary
Joint Editor	: Rev. Henjalen Doungel
Contributing Editors	: 1. Rev. Letpu Kipgen 2. Rev. Onthang Haokip 3. Rev. Kaikhokam Chongloi 4. Pastor Paokhohao Haokip 5. Pastor Satminlen Khongsai
Cir. Manager	: Ms. Lhingjanem Haokip
Design & Layout	: Hemkholen Haokip

THUSO LAHMAN

Church/Organisation/ DepartmentRs. 300/-
IndividualRs. 200/- (Post a Rs. 250/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 8131803543 Contact thei.
Circulation to kisai lam Mobile No. 9862633173 bol ding.



“Kipah a Kilemtona”

Editorial

“Hungun, hungun, Pakai vahchoiyute, Alungsetna sumil ding koi ham? Kumlhunga damsela eiching pau ahi, Tonsot tonsot in amin loupi jing hen” Houbung La No.349.

Thumakai:

Amasatah in muntina um Kuki Christian chate jouse ahideh a KBC member ho jouse chung a i Pakaiyu Jesu Christa minin salaam kahinpe cheh uve. Tulha thupi chu “Kipah a Kilemtona” kiti ahina, toh kilhonin, hiche thudol ah chomcha ana kihoulim u hite.

Phat Kihei Chin

Phat leh nikho ahung chaal chaalin, tuhin kum ahung lhung tan, thinglhang loulhouhon chaang asuhtup phat u, phailei lhouhon jong chutobanga chu lholhun asuhtup phat u ahitoh kilhonin natohna a kona chol phat jong ahung hitan, natoh chom chom leh lekha jilna vanga munchuom choma umte jong inlam ahung nai jep jep tan ahi. Lhamasa lam a Chavang hung kipat tah toh kilhonin niso leh nilhum jong ahoiyin, masanga pon leh von theida a adap theina ding penna umma chu tuhin phalbi lam mano ahitó kilhonin, pon lum ima holna leh ngaina phat ahung

hitai. Mihem lungthim leh tahsa a kinai jeng hilouvin, lhagao lam jenga jong kinaijep phat ahung hitai. Hijeh a chu, Thuchihbu sunpa'n, "vannoi yahin thil ijakaiyin phat aneiyee..." atihi hung dih a ahitai.

Kipana Phat

Hitobanga natohna a kona cholna, kumlunga inatohga i-inmuna pohlutna, icha-inau, isopi kumlunga kimutolouho kimutona phat leh nuikhomna, neh leh chah holna a kisugim beh louva inmuna idudu nehna, khosung leh houbung sung jong kumlunga toh leh tham jalla kisungim man lou tua hi suhthengna leh jep hoina, khosung/houbung mi jousen jong ihina kham khama anneh kikholna leh lungmonga umna, kholgama jinhon jong thilthah leh hetna a hinpolut a khosung/houbung sung jemhoi leh kipasah, ha-osa-upa ho jong mihem apunjeah a thanopna nei, meithai-chaga jong hetdoh leh kithopina um leh adang dang ho jalla kipana phat ahung hitai.

Kilemtona Phat

Mihem hina khat in, neh leh chah ima hung nena, sil leh chen lama ahikham kham aum teng leh lung thim kipana aum jitai. Khat leh khat mai lhaisela kilem toa, kum lhunga ituo (experience) ho kiseipeh toa, kitao peh toa, nui-khom, sah-khom phat chu ahung hitai. Hijeh a chu Labolpa'n 'Hungun, hungun, Pakai vahchoiyute, Alungsetna sumil ding koi ham? Kumlunga damsela eiching pau ahi, Tonsot tonsot in amin loupi jing hen' atihi hunghi ah ahitai.

Thukhumkhana

Kipah a kilemtona hi Christian te chondan phatah khat chu ahi. Chutobanga kipah a ikilemto thei tengu leh Pathen jong kipah in tin, eimahokah a kingailutna leh kipumkhat-na pungin te. Lunglut tah a sim jouse chungah Pathen vangpeh chang hen lang, chuleh nabonchauvin Christmas leh Kumthah Chibai kahin peuve.

THUCHU

tahsaphe ahung soh tai.

John 1:14

Rev Henjalen Doungel
Mission Secretary

SERMON

Hichehi Bible a kimu thilsoh ho lah a thilkidang pen khat chu ahi. Hiche hi Jesu Christa lhana kona athodoh kit sang in akidang jon, chule aum-louva kon vanle lei hung kisem doh sang in jong akidang joi. Hichu pentil neilou, munjouse a um, tonsot Pathen chapa mihema ahung pena mihemte umchantho ahung pen, hetjoulou Pathen hetthei mihem chapa a ahung pen kiti hi vannoi leiset thusim a thilkidang lah a kidang pen chu hijing ding ahi.

Leon Morris kitipahin hiti hin anasei je. Chomchakhatna kiseidoh bible chang, Pathen kamchenga kon pot chu tahsaphe ahung sohin mihemte thina a kon lhatdoh din ahung pang tan ahi. Hiche thuguh hi isei tengu leh Paul in ase chu geldoh u te "Koichu hiche thugil kholdoh jouding um ding ham, kineosah tah in kunu hitin hetthei nadin lhagao theng kipuisah u hite (Cor:16).

1. Tonsot a um mutheilou Thu chu Tahsaphe ahung soh tai.
Gospel John nin Chapter 1 verse 1 ase "atila chu thu um ahi" ati hi Jesu Christa aseina ahi ti verse 17 a ahil chene. Hia hin aman Jesu chung chang a thilni aphochen in ahi.

A. Anaumsapeh Thu akon ahichun Jesu chu Pathen lhingset ahi apho-chene.

Hiche hi verse 1 a kichen tah in imuvin ahi. John in Jesu chu Pathen chapa tah beh ahi ti aphochenin ahi. Pathen in thilsem jouse masang in Thuchu aseme atipon, hinlah atila chu thu uma ahi atijon ahi. Hiche hin avetsah chu Thu chu atilla pat anaumsapeh ahitai. Ajehchu thu chun kipat na anei poi ti John thiljih hin aphochen e, chule Amachu apa Pathentoh thakhat ahi ti apho chene.

Satan in Jesu Christa chung changa thudih ahechen in ahi. Hijeh chun aman Christian te adounachu houbung sunga houchom/tahsan chom hinpolut Arius mangchan 4th century a Christa Pathen

chapa hina chu ahin tat in ahi. Arius chu mitam tah in ahin jui tan ahinlah Council of Nicea (325 AD) Constantinoupal (381 AD) chule council of Chalcedon (451 AD) hoa Pathen lekhabutheng khol-toh na nei church father masa hon ahin pompeh tapou vin ahi. Hiti hin Jesu Christa Pathen chapa hina chung a kinel nahi Unitarian, Liberal Theologians Jehovah Witness chule Mormon ten jong aboipi jing nalai un ahi. New Testament Bible in vang Jesu Christa hi Pathen ahi tin anam detin ahi. Ajeh chu amatah in jong keima Pathen chapa kahi ati. John 8:58 a chun Jesun atila pat anaum sa ahina aphong doh in Abraham penmasanga anaum kahi tai ati. John 10:30 a Keile kappa chu khat ahi atin chule John 14:9 a aman Philip koma koihile keima eimu a chun kappa amu ahitai atin ahi.

Pathen lekhabu theng hin Jesu hi Pathen ahi ti aphong doh in ahi. (Jn 1:1,20:28, Rom 9:5, Titus 2:13, 1 Jn 5:20) hinla akicheh na pen chu Heb. 1:8 hi ahi. Old Testament a Yahweh kiti hi New Testament a Pakai kiti hito akibang in ahi. (Isa 40:3 hi John 1:23 to akibang in Jer 23:6, Joel 2:23 hi Acts 2:21, 4:12, Rom 10:9-10 to akibang e. Isa 41:4 a keima Alpha le Omega kahi apatnale achai na kahi atihin Ama hi atilla anaum sapeh Pathen chu ahi ti aphochenin hichu New Testament a Jesun keima amasa le anukhah kahi ati hin atila pat

na um ahi aphochene Rev 1:8.

Jesu hi Pathen dih tah ahina Bible muntam tah a jong akimu be e. Tonsot Pathen ahina Jn 1:1. Munjouse a um Pathen Matt 28:20, Hatchungnung Pathen Phil 3:21 Thuneichungnung Pathen Phil 2:10 chutengleh Jesu hi Thiljouse sempa Jn 1; 3.10, Hb:1:2. Mithi kaithou Jn 2:25-26, Satan galjoupa Eph 2:21 Mitin thutand-ing pa Jn 5:22-23. Chonset ngaid-am pa Mk 2.5-7 chule Mitaona sangpa Jn 9:38. Mihem khat chun Jesu Pathen hina tahsan lou vin New Testament atahsan thei poi. B. Tonsot aum Thu chun tahsa hina ahin kilah phat in Mihem pilhing tah khat ahung hitai.

Thu chu mihem ahung soh tai, thu chu mihem tahsa ahung soh tai tia John hin ana jih thei ahi. Hinlah aman hitichun ajih pon Thu chu tahsaphe ahung soh tai ati-jon ahi. John in hitia aseil onahi chuche lai phat a Jesu amihina chung changa minel loi Docetism ho minel kal hilchet nadia tahsa phe ti ahin man ahi. Ajeh chu amahon Jesu chu mihem lima bou hung ahin mihem ahipoi atiu ahi. Hinlah Jesu hi Nungah theng Mariam sunga ahung kijil a pat a chu mihem khat hina lhingsetna hung kijil ahitai. Jesu chun mihem hina jouse aneija hung peng ahiti ahilchet nom jeh a hitia hi John in "tahsaphe" kiti thucheng aman ahi. Jesu hi Pathen jong ahin mihem jong ahi. Mihem a ahung pen hin a Pathen hina adalaha

deh poi,amihem hina chu aPa-then hina a chu ajaosah joh ahi. Amihem hina mong mong chu adangchah thei jin agilkel thei jin achol thei in alhasam thei jin lheppatep in aum in chule mi-hem bang in athin hinlah a Pa-then hina a chonsetna aneipon thina a kon athou doh in tonsot a hing jing din vana achengtai.

2. Tonsot aum Thu chu muthei Jesun eiho lah a ahung cheng tai. Thuchu eiho lah a ahung hing tai tia john in asei thei ahin hinlah aman thuchu eiho lah a ahung cheng tai atijon ahi.Mi-hem lah a hung chenlut kiti hi ponbuh ahung son lut ahilou leh maichamphung hung hi tia ledin John in aman original text achun aume.Maichamphung/tabarnicle chu Pathen in Isreal te koma aloupina atahlang na mun ahibang in Jesu chu Immanuel ahin hichu Pathen in eium piuve tina ahi.Maicham phung chu Isreal te camp lailung a aum jing bangin Christa jong houbung lailung a aumjing in ahi.Pathen kilhainale kihouna mundia mai-cham phung akibol bang in Jesu a eiho kilhai na akisucham kimin chule ama a Pathen to kiguijop na aum in ahi. Pathen maicham-phung /Jesu ilahuva ahung chen chu amihem hina temporary hilou vin mihema leisetna achen joh chu tempory ahi najoh aphon doh ahi.

Thu chu tahsaphe hung soh am? achuti leh amachu amite chonset lainat pi thei hiding ahi.Amachu lhep patepa anaum jalla mi-hemten atou patep naho ichan a hahsa ham ti ahetpeh ahi.

Thu chu tahsa phe hung soh am?achuti leh amachun Pathen in itilam lhah dinga eidiei u vam ti eihil thei dinga ahi.

Thuchu tahsa phe hung soh am? achuti leh eiho tahsa athithe, achonse thei hi aman ajachat pi pon vangam a amato cheng khom dia gontup ding ajachat pi poi.

Jesu mihema ahung pen hi Pa-then in mihem tea ding atoh lenpen le kidang pen chu ahi.Mi-hem limle mel pua Pathen chapa ahung pen hi Pathen in mihem tahsa phele voujang hi deisah taha asema hinna hu akhumpheh a leisetchung mopohna ladinga alimgon ahi ti photchet na ahi. Pathen in mihemte hi achonset vangun ajachat pipoi.Mihem chonset na alhah a atahsa Pathen hinna lhagaotheng chennathei loudia asuh boh jalla kikhenna anaum vang chun alungsetna punbe nale angailutna pun-benajoh ana hijon, achapa Jesu mihema ahin pensah a leiset mihem te atahsan jouse tonsot hinna chang dinga tohgong anei na thilgon loupi tah hung kipat nachu ana hijoi.



Mathew 2: 6

Sermon

Vo Bethlehem Judea gam Judah vaipote lah a nangma itina ma jongle aneopen nahipoi, ijeh inem itile nalah a kona vaipo khat kamite Israel te ching ding chu pengdoh ding ahi tin themgao seija konin aki sunne atiuvn ahi.

Introduction:

Bethlehem Judea khopi Christian ten lunggil tah a ana jabol uva chule athenga asim u ahi. Ajeh chu Jesu Christa Huhhingpu penna mun ahijeh ahi. Hiche khopi neocha hi mile som sagi (70) tobanga Nazareth khoa konna gamla chule mile gup (6) tobang lhanglam Jerusalem a kon ahi.

BETHLEHEM KHOPI HI GAMNI IN AKIKHEN NE

Hebrew te Bible a kimu dungjuijin Judate gamkol khat sung ahi akiti. Anina pa hi ahileh Zebulun phungsung gamkol khat ahi akiti. Hiche pahi Galilee noilam Nazareth sah lhumlam ma konna mile 4 tobanga gamla ahi.

THULHUN THAH (N.T) A KIMU DUNGJUIJIN VEOHITE

Thulhun Thah (N.T) a hin Gospel nia konin akimun ahi. Hichu Gospel Mathew leh Gospel Luke ahi. Ani gel Ihonin Messiah chu Bethlehem Judea gama peng ahi tin aseihonne.

BETHLEHEM ATHUPINA HO LEH ACHUNGA THILSOH HO

Mijousen ihet uchu ahile Huhhingpu Jesu Christa hi Bethlehem khopia peng ahi tihi ahi. Ahinlah Bethlehem Jesu penna mun le adang dang athupina ho achom lam in veohite. Hiche khopi neocha hi Judah gam thinghang mun ahi. Amin mong mong hi Ephrath tin aki hen ahi (Gen. 35:16; 19; 46:7; Ruth 4:11) ahin hiche khopi hi "Bethlehem Ephrath" tin jong aki hei (Micah 5:2). Chuleh "Bethlehem Judah" (1 Samuel 17:12) leh David Khopi tin jong akihei (Luke 2:4).

Bible a kimu dungjujin Bethlehem mun hi Jacob dingin jong a inneipi angailut tah Rachel thina mun chule akivuina mun jong chu ana hi (Gen. 35:19).

Judges 17: 7-13 dungjujin Levites(Thempu) ho in chenna munjong ana hi. Chule Micah themgaopa dingin jong athempu in apange akiti.

Bethlehem Sahlang (East) hi Ruth thusim kipatna le Jesu Christa khanggui thusim hung kipatna mun ahi (Ruth 1:1-2, 19, 22; 2:4; 4:11).

Bethlehem khopi hi Leng David penna munleh leng dinga Samuel themgaopa in thao ana nuna mun jong ahi (1 Samuel 16:4-13). Chuleh Bethlehem tuikul a konna David Sepai thumin hinkho phal

leova twi ahin dop uva Adullam Songkoa um David chu adonsah uva ahinkho ana huhdoh u ahi (2 Sam. 23:13).

Bethlehem khopi hi neocha hi jongleh khopi dang sanga aki danna pen chu ahileh Pathenin akitepna achapa Messiah vannoi lhatdam/lhatdoh na dinga ahin solla apenna mun thupipen chu ahi.

Sopite tunia iseinom pen u chu ahileh hiche Bethlehem khopi neocha chu Pathenin aman chah a achapa Jesu Christa penna mun thupipen leh minthang pen na vannoiija aumsah hin nangle kei ibonchaovin minem nung pen hijong leohen, Pathen ama manchah ihi thei na dingun, ilungthim u/ ilung kot u hongu hitin Christa penna mun thupi pen hidingin kigong uHITE.

Ajeh chu Pathenin ahao avai, alen aneo khentum neilouvin mijouse dingin achapa changkhat seh chu lei mihem naosen hiche bong Inn bong jun le eh namse lah a chun ahin pen sah in ahi. Koi hile ama (Pathen) tahsan chan chu tonsot hinkem lou anei thei na dingin tia John 3:16 in ati bang hin eihon jong tonsot hinkem lou ineithe na dingun Pathenah kipeu hitin tahsan nan pang det jing uHITE.

Pathenin asim jouse phatthei boh jing taken.

Vannoi huhhingpu pen na dinga Mary le Joseph kigel lhahna

(Lk 1:38, Matt, 1:24)



*Lhingjanem Haokip
Secy. Women Dept., (KBC)*

Sermon

Thumakai: Amasa penin Mariam hinkho achomlam tah in veuhite. Mariam Mary jong akitin, amahi David phung mi ahin, apahi Joachem akitin, anu hi Anna akitin ahi. Anu le apa hi Pathen ngailu tah, Pathen masanga kingai nemtah, mi nunnem ahilhonne. Anule apa tahsan na let jal hin Mary jonghin Pathen gin nale jana aneijin ahi. Amao insunghi haosa le nomsa vang ahipouvin, genthei tah a hung khosa Pakaija kingai jing insung khat ahivu. Pakai vantil in Mary kom'a chapa khat nahin ding ahi tia aseiphat tah hi Mary tahsa lam'a kum 18 vel mi hidin akiseije. Mary in Pakai agin nale ajana jal chun Pakai mitvet in lunglhai um ahitan, Nazareth khosunga nungah aching athem tamtah umnante, hinlah Pathen lunglhai na chu Mary hi ahung hitan ahi.

Mary le Pakai vantil: (Lk 1:29)

'Chibai sah chungnung nu Pakaijin naumpi' tia vantil in Mary kom'a athusei thucheng hin avetsah chu, nungah tamtah lah a deilhen ahina khat avetsah e. Mary hin Pakai thusei ajah phat hin, dat jong adat mon, kijong akichan ahi ti akimun ahi. Gaijin natin chapa khat nahin ding ati chun Mary in hichu iti hithei dingham pasal la kaneipon tin adonbut in ahi. Ajeh chu hiche phat lai ja hi mary hi Joseph toh kicheng dinga umsa, tulai paovin kisei leh engagement kibolsa tina ahi. Pakai thusei chu Mary ding hin apettah ding chun kipana sangin lunggim na joh asohtan ahi. Mary hi tahs mitvet ding chun ima hilou maithei ahi. Hinlah nungah theng Pakai ging jing ahinkho a nolna bei mi ahinapa jal chun Pathen mitvet ding chun mi tamtah lah a amahi vannoi huhhingpu pen na nu hidingin lhendoh in ahung umtan ahi.

Tuhin Mary dinmun dinghi gah kihi sah le chun ipi ti nagel dem ? Nungah laitah a mikhat toh kicheng dinga kigotna nei laitah a pasal toh kitimat na neilouva chapa khat nahin ding eikiti chu agel nop na dem ?. Tahsan jong umthei louding, chuleh langkhat a lunghan jong um dingin tahsan aume. Hinlah Mary Pathen ging numei khat ahijeh in

hichu iti hithei dingham tin Pakai thusei chu ana nel tajongle keima Pakai sohnu kahi kachunga nasei bang chu lhung taken tin nopna kigel lhahna aneitan, hiche athu-nun napa jal chun Pathen loupina achantan ahi. Tunin Christian eiho Christa khonungjui hon Mary dinmun hi ihadel diuvin Pakaijin eidei uve. Mary in Pathen agin nale athupeh anit napa eiho Christianten jong ivetjui uva eima lunggel leh lunglam'a chon sanga Pathen in eideipeh hinkho mand-ing joh kilhen dingin ikitiem uve.

Joseph leh Pakai vantil :

Joseph hinkho hi ivet leh gollhang khat hinkho a dinga lunggel hah-satah ahin, hinlah Pathen agin napa le ajana pa jal hin Pathen loupina achunga phondoh in aum-tan ahi. Judah te dan dungjuia chu kicheng dinga kiji hol (kikhao khina) nei jouva asukhel joh chu songa selih dinga dan umsa ahin, Joseph hin ajidinga ahol Mariam hi agaitai ti ahung kihet phat in mi hetna lhangphonga umsa ding anompon, guhthim'a kikhenpi ding lung angaito tan ahi. Ajeh chu Pathen a kon'a thilsoh hi-jongle mi hetding chun Mary joh chu dan sukhel danin akilangtan, hijeh chun Mary ding gelkhoh na jal chun achan ding gotna chu apel theina ding lampi agongin guhthim a kikhenpi ding chu ama lunggel chu anahitai.

Hiche phat laitah a Joseph lunggel dingle ahinkho dinghi thil bailam

vang hilou beh ding ahi. Gollhang khat dinga akichenpi dinga thil jouse gonsa umta a ajiding nun nao avop e kiti chu gakichenpi ding malah akom avella umding jong hahsa tah hiding ahi. Hinlah Joseph hin Pathen agina le ajana jallin Pakai Vantil in athupeh bang bangin thunung tah in ama lung-gel pa chu donta louvin Pakai thusah joh in ainneipi agakipui luttan ahi. Hijeh chun khangdong khangthah ten jong penthah na kaneitai iti jou uhin Joseph le Mary hinkho Pathen thusah banga achon na lhon hi vetjui in neithe leu hen imakhouva ilamjot u Pathen lungdei lam hung hitthei tante.

Chuti ahijeh chun sopi tunin Pa-thenin nangle kei jong Mary leh Joseph banga athupeh nit dingin eitiem jingun ahi. Amanin Huh-hingpu hung pen na dinga thul-huhna hahsatah Pakai thusei nitna a hahsa jongle Pakai kamsung thupot anitna jal lhonin tahsa a dingin Jesu pen na nule pa ahung chang kha lhontan ahi. Chuta-banga chu eiho jong Pakai lungdei leh athupeh init uva, Ama ginga hinkho iman tengu le ichan diuva kilom lou phat theina jong ichan theiju ahiti tahsan lelina neilouvin Pakai thunoija thipbeh chan a anga kuncheh in Ama lunglam bolnu bolpa hithei cheh dingin Pakaijin eidei uve. Pathenin asim jouse Ama lungdei lam boldoh na dingin phat thei boh cheh taken.

Kakipah e.

CHRISTA HOIYA PENG DING HAM?

(Mathew 2:4)

Pr. Haoneo Haokip

Secretary, Literature & Publication, KBC

Sermon

Jesu Christa apen a ahsi lekhatthem (solam miching) hon, "Judate lengpa apengin ahi, ama chu hoilam ham? Keihon niso lamah ahsi kamu uvin, chibai bol a hung kahiue," atiuva naosen (huh-hingpu Leng Jesu Christa) peng chu chibai boh dinga ahinhol nauva kon a Jesu Christa pen thu chu leng Herod in ajah doh phat in thempu pipui ho le danthu them ho akhomin, "Christa hoiya peng ding ham"? tin Christa penna ding mun chu ahol/ akhol tan ahi (Matt. 2:1-4). Hichea hin Jesu Christa penna mun hol/ kholna lamchom chom ni (Ahsi lekhatthem ho holdan le leng Herod holdan) akimun ahi. Hichea hin 'Ahsi Lekhatthem' kitiho hi koi/ itobang mi huiua, 'leng Herod' kitipa hi koi/ itobang mi ham tilam thudol hi seida mai tau hite; ajeh chu amaho hina le natoh dan thulam sanga Christa ahol/ akholdan'u thulam joh hi hichea ivetnom'u le iseidoh nompem'u chu ahi.

1. Ahsi Lekhatthem ho

Ahsi lekhatthem hon ahsi a kon a Christa pen thu ahinhet het'u chun ahsi chu ahinjuyun, Christa chu ahinhol tauvin ahi. Amaho hi chuchelai phat a dinga miching/ mithem, adeh a ahsi lam to kisaiya themna le hetgilna nei (Astrologers) ahiue. Amaho hin achih/ ahthep/ aheth gilnauva kon a Christa pen ahin het-doh'u chun Christa chu leng (huh-hing) dinga hung-peng ahi chu ahethemun, achih/ athepnauva kiletsah/ kithupisahna beiyin kineosah tah in Christa chu chibai boh (hou) dingin ahinholuvin, agamudoh phat'un kineosah tah le jana neitah in bohkhup in chibai aboh un ahoutauvin ahi. Christa ahounauva chun amaho chun agou bomuva konin athil

poh'u asolhauvin kipa manin sana, bego, myrrth apeuvin ahi. Hichea hin thil ni akimudoh in ahi.

1.1. Kineosah tah le Jana Neitah a Pathen hou

Ahsi lekhatthem hon Christa ahin holdan'u le ahoudan'u hi ivet le kiletsah/ kilalsah/ kithupisah/ kichih-sah/ kithepsahna pailha a kineosah tah le jana neitah a Pathen houdan akimudoh in ahi. Hiche hi Christian te Pathen houdan ding doltah khat ahi. Ahin, hiche hi tulai hinkho, adeh a Christian te lah jenga jong mi tamtah in abol nomlou le aboth-eilou thil khat danin akilang jingin ahi. Mihem in ichih/ ithep/ ilet ilalna hoa kichihsah/ kithepsah/ kiletsah/ kilalsahna lungthim le hinkho pum a ahiding doltah a Pathen kimudoh theilou/ kihou theilou

ahi; ajeh chu hitiho hi Pathen dou-na ahin, Pathen deilam le Pathen houna to kikal ahin, hitobang miho chun dihtah a Pathen amudoh thei-ji lou ahi. Christian ten hitobang lungput le hina ho hi pailhah a, Pathen anga kineosah le jana neitah a ichih/ ithep/ ilet/ ilalna ho hi Pathen deilam to kitoh a manchah ding ahi. Huh-hingpu Leng Jesu Christa pen kipapina Christmas hi kichih-sah/ kithepsah/ kiletsah/ kilalsahna hinkho pum a naman jinga hicheho pum a hi Christa nahol jing nah lai le Christa chu dih tah a nakimu doh joulou ding, nakipa tah tah theilou ding, vel ijat mang jongle chun alhem (atah tah hilou) hijing ding, phachom tah tah louding, athon hijing ding, hichu nanga dinga vangset umtah hiding ahi. Huh-hingpu Leng Christa chu kiseosah tah le kinemse tah a gan in a gan ankonga hungpeng ahi. Hichebanga hi eiho Christian ten jong kichih-sah/ kithepsah/ kilsetsah/ kihisah/ kilalsahna ho pailha a, kineosahna le kinemsena pum ajana neitah a Christa iholuva Pathen ihoudiu ahi. Hitia holten bou Christa chu dihtah a akimu/ akisan thei ding ahi.

1.2. Hongphal tah le Kiphal Theng Tah a Pathen hou

Iseisa bangun, sana bego myrrh kitiho hi thil mantam/ thil malu, gou thil-lu ahiuvin, it umtah thil hiding ahi. Ahsi lekhatthem ho chun thangthip/ engset/ chipset bol-louvin hongphal tah in hiche thil ho chu atoh doh'ugin kipah tah in Christa chibai boh (hou) nan aman-

gugin ahi. Hichea hin hongphal tah le kiphal theng tah a Pathen houna akimudoh in ahi. Michip se, mithang thip, mi-engse ho le mi-honphal louhon dih tah in Christa amuthei pouvin, dih tah in Pathen ahouthei pouve. Christa chun van a Pathen to kikot a alal touna munpi ahindalhah a, nang le kei hintheina le phat theina dinga lei mihem a hung penga thina changeiya ahinkho aphaldoh ahi. Hitobanga hi eihon jong chipset/ thangthip/ engset bol-louva, hongphal tah le kiphal theng tah a Pathen ihou diu ahi. Christa pen kipapina Christmas namanna a hi Christa min a ipi/ ijat naphal doh ding ham? Neilou vai-cha genthei, nelou/chalou, sil lou/ cheng lou, ana/damlou ho dingle Christa Kipana thupha heloulai hon ahet doh theina diuva lung thim gil a ipi/ija naphal doh ngam ding ham? Christmas manna dinga tod-ing leng ho chpselou beh a kipah tah le kiphal theng tah a natodoh hinam? Nakiphal theng jou laoulai le na Christmas mandan dihthei/ dih joulou lai ding, Christa chu dih tah a nakimu doh joulou ding ahi.

2. Leng Herod

Leng Herod in, "Christa hoiya peng ding ham"? tia Christa ahol chu, ahsi lekhatthem ho banga chibai boh ding le houdinga ahol ahipon, thading le suhmang dinga ahol ahi. Hijeh chun, alung tup molso teina dingin ahsi lekhatthem ho chun Christa chu agamudoh tengule amajong ahin hetsah diuvin athulhah in ahi. Ipijeh a leng Herod chun

ahungpeng Christa chu thading/suhmang dinga ahol jeng hintem? Hichea hin thil thil dihlou le thil phalou tah ni akimudoh kit in ahi.

2.1. Let le Lal lungvulna Hinkho

Leng Herod chun let le lal adei behseh le agelkhoh behseh jeh a aleng hina dinmun chu chanding/lhading chu adat thei/ agelthei mong mong lou ahi. Hijeh a chu, ahungpeng Christa chu leng ding ahi, akitijeh a ama leng hina chu hinson khante tia, kihih haona le let le lal chuna a Christa chu thading le suhmang dinga ngaitona a ahol ahi. Let le lal chuna a Christa ahol chun ahol khel tan, hijeh chun Christa chu amujou tapon ahi. Let le lal lungvulna hinkho pum a Christa nahol le namujou louding ahi.

2.2. Engset/Thangthipna Hinkho

Leng Herod chun ama leng hina dinmun a midang ahung din khah ding chu engset/thangthipna lentah anei ahi. Hijeh a chu, Christa ahol chu lengin hungpang khandin ama hinson khante tia engset/thangthipna jeh a thading/suhmang dinga ahol ahi. Ahin, Pathen thilgon chu mihemin asuh set jouhoi ahilou jeh in, ahsi lekhatthem ho chu amanguva Pathenin Herod henglam a kilekit taloudia ahinhetsah dungjuia amahon jong lamchom lam aho phat uva khonunga leng Herod chun Christa pankahna tei tei ding tia Bethlehem le akimvel jousea pasal chapang jouse athagamlo ahitai. Hiti hin, leng Herod chun let le lal

chuna le engset/ thangthipna jeh in Christa chu aholkel tan, Christmas chu tolthah nan anamangkha tan, Christmas anamang khel del tan ahi. Tunia nanging jong letle lal chuna le engset/ thangthipna hinkho pum a Christa nahol a, hitobang lungput le hinkho pum a Christmas naman jing nah laiya ahile leng Herod tobang bep nahi ding, na-Christmas man dih loulai ding, Christa nakimu doh joulou ding ahi. let le lal lungvulna le engset/thangthip pailha theilou hon dih tah in akimu doh thei pouvin, dih tah in Pathen ahouthi pouve.

Chunga kiseiho hi phatah in ngaiton lang, tuchung Christmas nammanna a hi ahsi lekhatthem ho banga Christa nahol a Christmas naman ding ham, leng Herod banga Christa nahol a Christmas naman ding ham? Christma kiti hi Christa holna, mun le kisanna phat phatah ahi. Ahsi lekhatthem ho banga naho le namu theiya nakisan thei ding, Christmas mangkha/mang dih nahiding; leng Herod banga nahol le namu theilou ding, nakisan thei louding, Christmas alhem a mang nahi nahlai ding, amang khel/ amang dih lou nahi nah alai ding ahi. Leng Herod banga let le lal lungput le engset/thangthipna hinkho pum a Christa nahol le namuthei louding, ahsi lekhatthem ho banga hongphal tah le kiphah theng tah a, kineosahna le jana neitah a Christa nahol le namu thei ding ahi. Tuchung Christmas a hi nanging Christa iti nahol diham?

PHAT KIKHEL LE CHRISTIAN HINKHO

(Happy New Year thupi)



Rev Onthang Haokip

Secy. Christian Edn Board, KBC

Ephesus 4:23; 5:17-19

Sermon

Happy New Year Greetings to All my beloved KBCians in Christ;

2018 kum sunga itobanga hinkho inamanuvem chule kumthah 2019 mutheija galkai jousen ipi kibol leh phatchomna akimu theidem tia kingaito phat chu ahung lhung kittai. Mihem hinkho'a boipi umpen chu 'kikhelna' ahi. Vonluitah a kivonjing mi khat chun itih leh Vonthah a kivonding ham tichu ageljing teiji e. Gentheina hinkho mangjing mi chun itih leh nopsahna hinkho kamangtheidem tihi ageljing ding ahi. Tehse ho paocham tuh in, "Va-ah in khovei leh kacha kaang tante" atiu hin khovei kineppina lung lunggel akinei cheh e tina ahi. Angaijin mihem jousen kumbul a pat kumkim chan in kumlhun ding akingahl-el ji in, kumlhun lam leh kumthah lhunding akingahlel kei kitjin ahi. Miching ho thusei khat ah, "Mihem hinkho a akikhellou pen chu phat tin'a kikhelna umjing hi ahi", tin aseijun ahi. St. Augustine in aseina ah, "Ka Pathen nangma Tonsot pa nahin, Keima mihem bou kahi. Mihem hina chu phat chesa leh phat hunglung ding kikhah a bou um kahi", atin ahi. Hitobang kikhelna thu hi Christian ten iti ihet'uva, itobanga hinkho imanjiu ham?

Phat le Nikho kikheldan:- Spain mi, Kuong toul Christopher Colum-

bus kitipa hin gamkhol'a Koung Innei tol a avalena a kon in Leiset hi alum e tihi anapohdoh masah pen ahi. Chuban in Leiset a miching Scientist hon athil kholnau'va ahin muchet dan u chu ahileh, Leiset hi alum in khatvei akip-eilhung chan'a nikho khat a kisim ahi. Nisa kimvel'a kipeivilvel Planet neocha(Leiset) hin Nisa velkhat avellhung teng hichu kumkhat a kisim ahi ti hi agom lamtah a ihetcheh u ahi. Hiche a kon'a iseinom u chu Pathen in mihemte thilpeh lenpen kibang ten'a eipeh u chu 'phatchedan isimtheiju' hi ahi. Phat chesa ho hi koukit thei hitalou, hung kilekit talou ding ahin, hitia kikheljing phat toh ichekhom jing laijuva hi inatoh ithilbol hou apha hihen ase hijong leh nikhat teng Pakai Laltouna anga thutanna a ikilah cheh dingu ahi. Hiche nikho chule sohpha tahsan umtah nabol aphotave! eikiti dem or soh gilou le panna bei, kale hagelna a chun seplut tauvin eikiti dem(Math 25:45), phatecha'n ngaitophau hite. Phat mantam dan hethem'a mangthem ten Pathen phattheibohna amube jing diu, mangthemlouva chonsetna le khangitlouna a mangte manthahna a lutdiu, achaina leh kisiha le manthahna a lutdiu ahi.

Kumthah(New Year) adia kigot ding dan:- Chunga ihinseidoh tah bangun Pathen thilsem lah a kipeIngaillou angaija chejing

phat le nikho hi Round khat akichai teng abul'a(January 1) a ithah simkitjiu ahi. Hiche kumthah itiu hi tunin alhangpi'n vannoi Calendar kimang jong leh munchom chom'a mihon kumthah nikho hi phatchomcheh in amangji nalaijun ahi. Vetsah na'n; Israel te, Meilheite, Burmese te chule adang dangin March/April sungah amangjiuvin ahi. Bible a kumthah kiti hi Israel ten amangun, eiho Christian te dingin kumthah aumchompoi. Mitheng Paul in Ephesus mite lekha athotna a "Vonhah kivon un, Lungthah kengun lang limchom pu'uvun hichu Pathen lim'a asem ahi"(Ephes.4:23), "Tulai nikho hi aphotlou jeh in phat kijenpet hi kichoh un. Hijeh chun lungthim beijin umhih un", (5:17) atihin kikhelna giltah avetsah in, phat leh nikho kikheljah a kipading hilouvin Christa a khikhelna hi kipana lenpen ahijoi. Kumle lha akibechan hin Pakai nikho hunglhunding asunaije ti geldoh jing angaijin ahi.

Thuchaina:

Chuti ahijeh chun Sopi deitah te, kumlui kumthah umchomlouvin nitin in Christa a din hinkhothah mangjing uhitin, Pathen phatthei bohnabulhingset a idonjing theina din Amalung got lamah chonjing uhite tia ikitemnau toh kilhon in Kumthah vangbohna changcheh ute.

66th GENERAL ASSEMBLY KOUNA

Amun : KBC Centre Church New Lambulane KBC No.1.

Lhunkim : 28th January 2019.

Aphatsung : 29th – 30th January 2019.

Kikhennl : 31 January 2019

Pakaija ngailut umtah, KBC General Assembly member ho jouse, min ngei chungnung I-Pakaiju Jesu Christa min'a kangailutna kumthah chibai kahin peuve. 2019 Calendar of Events, dungjuia chungu kipe munle nikho sunga hi 65th General Assembly umding ahin. Hiejhchun, member ho jouse thonlouva hungpang cheh dingin kouna kahin neiye.

Assembly Member dingho chu:

- > President, Vice-President, Assembly Secretaries, Auditors, Committee le Board hoa member jouse.
- > Ex.President ho, Pensioners, Deputations, Auditors.
- > Convention Pay Workers Missionary le Evangelist ho jouse.
- > Convention Elected Member ho jouse.
- > Gambih a Chairman, Secretary le Department Chairman leh Secretary ho.
- > Houbung (local le centre church) thalheng khatcheh (Bap tized member 100-200 chan ahileh mi 2 hiding, 200 chung lam ahileh mi 3 hiding ahi).
- > Men, Women, Youth Work Committee member jouse (Convention le Gambih).
- > Member at large (mi 2).

(Rev. Dr. M. Thongkhosei Haokip)

General Secretary

Kuki Baptist Convention

Notes:

Assembly hi New Lambulane Centre Church munna umding ahi.

Assembly adinga thil angaicha jouse eiman kipoh cheh ding ahi.

Registration Fee hi mikhat na Rs, 800/- hiding ahi.

Assembly a hi honorary le elected ho kilhenna um ding ahi.

Mission Column

Arunachal Pradesh a Danglat le Bekhuliang Houinn thenso hita.

Achesa nisim 3 Nov nikhon Arunachal gam Lohit District a Danglat houinn thenso na anakinei tai. Hiche houinn hi phat masa a anakivil lai ja chu achung tin kikhua go(he) a kichitho chule abang jong pheh kigena Pathen houinn ding a kilom lou, vetjou hilou houinn anahi. Hitabang houinn dinmun umchu anakisei phongin ahileh KBC Centre church Newlambulane in pohnatnale gelkhohna ananei un dangka lakh 2 lut in anasao vin lomtah le kipah tah in Rev Henjalen Doungel Mission Secretary in Pathen henga lhandoh na ananei tan ahi. Chujou



ajing nikho 4th Nov nin Bekhuliang houinn then so din anakikalsong kit in ahi. Hiche houin hi 2015 lama anakisapan ahitan khosung houbung miten sumle pai lhahsam jeh a jou joulouva houinn neocha khat a anakikhom jing ahieuve. Hinla kbc mission field sunga hitabang a houinn kisa chai joulou va aumjing hi nom akisa pon hijeh chun Mission office in pan akilan dangka lakh 2 akithot in houbung mite pan halah jallin sahchai jin aumin KBC Mission Secretary in thenso na anei tan ahi. Tuhin houbung mite kipah le thanom tah in hiche houinn thah a hin akikhom un Pathen ahoukhom thei taovin Pathen thangvah na ipeovin ahi. Mabana jong amachal jinga houbung pilhing tah ahung hinadin itaonao vah geldoh jing u hite.

KBC Mission Hostel Amrajan thenso hita.

KBC lamkai masa ho Mission natoh gelkhoh na jallin Amrajan Assam muna Mission centre dingin mun hoitah khat anachodoh un ahi. Hilai ja hin houinn khat le missionary quarter khat anakisan houinn kai-khom na jong thalhing tah in ananei khom jiuvin ahi. Ahin lah phat

chomkhat jouvin houinn dang dang ahung um phat in KBC Mission centre a kaiding ana um tapon houbung mi vengsunga umho jeng jong houbung chom chom a anakikhom taovin ahi. Hiche thilum chan chu akiven ahileh nom akisapon houinn hi avella chohing kit nadin



Evangelist Jamthang Haokip akisol in, Mission Centre a akium sah in amuna um KBC houbung mi jouse panlah nan kikhop khom na March Iha a pat chun Pastor Seiminlen Haokip Gambih Pastor hapan nan pilhing tah in aki tung doh kit tan ahi. Evangelist Jamthang Haokip le Pa Thanggin Chongloi Head Deacon le Secretary din akilhengdoh in member 40 tabang hi Sunday niseh leh Pathen ahoukhom jiuvin Hiti-chun Amrajan Mission Centre church chu athaha tundoh ahung hitai.

KBC Gambih no 18 Karbi Anglong hi education lama lhasamtah ahi. Thinglhang kho hoa school aneilou jeh un chapang tampi hi school kajou louvin aumtan chule khopi sunga school hung kaicheng jong umna pansatna kisuh aneilou jeh un lekha simho jong sangtah asimjou pou vin ahi. Gamsung mipite genthei nale hahsat nahi akiven ahileh akiponan agamsung houbung lamkai ho toh ahung kikihou-toh in achesa April lhalam a pat chun Hostel building khat sahna tohgon Amrajan Mission Centre a ahung kipan in ahi.

Hostel hi 16/48 ft alen ahin abana Kitchen attached kibol kit ahi. In-dana kisa ahin chapang 40 chan umnathei ding ahi. Study Hall khat aumin Latrine 4 le Bathroom 4 aumin ahi. Warden khat in aumpi ding hostel compound sunga hi study rule strict taha maintain kibol ding ahi. school kibol banga chena dan kitem a chapang ho lekhasim kitho pi na aphapen kipe ding ahi.

In ahung kisah chai to lhonin 7th Nov nin Rev Dr Thongkhosei Haokip General Secretary KBC in Kot honnale Pathen khutna lhandoh na anei jin mipin ankong sokhom na akinei jin ahi. kbovei 2019 apat hostel hi bolpan thei din aumtai. Hichana eihin puiuva Pathen thangvah na ipeovin chule hiche hostel kibol hi alolhin na din houbung mithneng ten itaonao va anagel doh jing u hite.

Punjab Mission Field survey.

Kuki Baptist Convention Mission natos Pathen in ahin mapui jing e.India gamsung mai hilou vin foreign gama jong Missionary isol doh thei taovin Pathen ithangvah uve.

Tulai India sunga Pathen nin kidangtaha na atoh na state Punjab gama lut ding Mission board tohgon ahi. Hijeh chun achesa nisim 9 nichun pa Jamk-hothang Haokip Mission Chairman Mission field survey bolin anakichen ahi. KBC Mission in lutnadinga kigong hi Jandiala Phillaur, Jalandhar khopi akon 5 km tabang a gamla ahi. Hilai muna hi Evangelist Amit Sandiala in Pathen lha-cha na atoh ahi. Amahin houbung jong pilhing taha aphudoh ahitai. Amahi KBC to Mission natos khom ding hi Pathen henga anataona hijing ahi. Pastor Liscentiate ahilou jeh in Ordain boldin KBC Ordination Committee in CEC a akipelut in CEC phatsah na a ahung lhung ding KBC General Assembly C/C New Lambulane a Ordain bolding a kiphat sah na um ahitai.

10th Nov. 10:30 am in Delhi a kon Jalandhar Bus a kana kalsong un nilhah lam 5:00 pm velin kaga lhung uve. Ajing 11(Sunday) nin amaho kaikomna "Kingdom of God Baptist Church" a Pathen houkhomna kaneikhomun Pa-



then thusei jin kapange. Pa Jamkthothang jong Pathen thusei jin apang in ahi. Pathen vahchoi lasah le thusei kipa nale halnan adimun apathen houkhom nao kitilkhoule thanop aumleh jenge. "Houbung hung machal hi seijui 12 ho jeh keo hilouva Jerusalem a kon jamdoh tahsan cha milham ho jall jong ahi" ti thupin kahou limin ahi. kaikhomna kichai jin kahung kinung le pai kit un nilhah lamin Delhi a Rev Letlal Haokip ina kageh un ahi.

12th Nov. nin Delhi tol pia munthupi phabep kaga veovin, 13 ni jinglam nidan 10:30 am velin kahung kipat doh un nilhah lam 1:00 pm donin Tulihal Airport kahung lhungun ahi. Kum 2019 apat Punjab gama Mission natong din ilung thim uvah kigot na ananei uhitin, taonan lhutjingu hite.

Youth Column

KBC CENTRAL CHOIR THAH KILA TADING



KBC Central Choir hi KBC in Pathen vahchoina lam'a kimangcha dinga ineisun-u ahitoh lhon in ahung chejingin amachal jingin ahi. Hito lhon chun tukum channa hungpang Central Choir member ho jong pachatna sangtah akineieye. Ajeh chu amaho hi atam-jo Pathen ngailut nale KBC ngailutna jalla kum 4/5 cheng hungpang ahiuve. Hichan a pan ahin lahnau hi suhmil thei ahipon amaho jallin Pathen thangvahna ipeuve.

Hito lhon chun nisim 13 November 2018 chun KBC Centre Church New Lambulane mun'a chun Album Releasing kingon toh amaho vailhahna ana kineitan ahi. Thilpeh manlu tahtah kipe jouhih jongleh jokham chun thilpehna ana kineijin, kipathu ana kiseijin amaho cheng lhahna kingon ana chelhatan ahi.

Hito lhon chun tua hi KBC Central Choir a pangding athah hungkila ding ahitoh lhon in KBC General Secretary pu a kon'a Gambih jouse le Centre Church jousea lekha hung kithotho hi amopohon phatah-a nahin gel uva akisei banga KBC Central Choir thah lahnadia pan inalah khom cheh diuva hetsah le temna ahungkineije.

BIBLE QUEST

RESULT 2018

Pathen panpina jal chun kumseh leh hung kiboljing Bible Quest hi tukum achesa October 14 chun Exam Centre jouseah ahung kibol kitan, hito lhon chun pan lajouse hihen chule akinganse dungjuiya avesuija pangjouse hijongleh kipathu sangtah in akiseiyin ahi.

Anoia chenghi tukum BQ a lolhinna neiya kipaman sangdingho ahi-tauve:

POSITION	MIN	HOUBUNG	GB	MARK
FIRST	Ng.TINNU KHONGSAI	Kulbung B. Church	9	93
SECOND	GI.LUNKHONGAM HAOLAI	Haijang B. Church	10	91
THIRD	VAHNEIHOI	Haijang B. Church	10	89

CONSOLATION PRIZE MUHO

- SL. NO. 1 LHINGNEIVAH KIPGEN Songjang B. Church No. 6 -88
- SL. NO. 2 LAMNEITHEM KIPGEN Songjang B. Church No.6 -87
- SL. NO. 3 SERATIN JOUTE K. Songlung B. Church No. 1 - 87
- SL. NO. 4 ZOUINGLEN JOUTE K. Songlung B. Church No. 1 -87
- SL. NO. 5 THANGLENMANG KIPGEN M. Tampak B. Ch, No. 8 - 86
- SL. NO. 6 JANGSEI GUTE Chingdai Khullen B. Church No. 2 - 86
- SL. NO. 7 CHINNEICHAN LHUNGDIM Khangbarol B. Ch, 13 - 85
- SL. NO. 8 LAMJALUN HAOLAI Haijang B. Church No. 10 - 84
- SL. NO. 9 LHINGNEIKIM KIPGEN Haijang B. Church No. 10 - 84
- SL. NO. 10 MANGKLHOLEN HAOKIP G. Songlung B. Ch, 4 - 84

KBC YOUTH LAMKAI JOUSE HUNGCHUH DIN AKILEM'E KBC YOUTH ANNUAL ASSEMBLY

12-15 December 2018

KBC Centre Church, Chassad, Gambih No. 17.

KBC CENTRAL CHOIR ALBUM THENSO HITA



Pathen panpi nale puihoina jal chun achesa November 13, nikho chun KBC Centre Church, New Lambulane mun-ah kilom tah in Rev. Dr. Thongkhosei Haokip, General Secretary, Kuki Baptist Convention in Thusim Ngei, KBC Central Choir in asem Gospel Visual Album chu thensona ana neitan ahi.

Hiche Gospel Visual Album hi vetnom umtah, Pathen vahchoila ngeitah tah Choir hon asah-u ahitoh lhon in Houbung tin'a khatcheh jong aman umlouhella ikilah thei-u ahi. Jubilee kum ahitoh lhonna hiche hi KBC Houbung jouse Thil Thonpeh a KBC General langa kon'a um ahi.

Chule hiche Album thensona kingon a hunglha jouse, adeh a Imphal tolpi sunga KBC Centre Church hoa Church Choir New Lambulane, NGV, Canaan Veng, Haokip Veng, chule Chassad Avenue Church Choir ho chungu kipa thu seijou lou akiphongin ahi.

Pathen in KBC Central Choir phatthei bohjing henlang machalna pejing tachen.

2018 SUNGA

CHRISTIAN EDUCATION BOARD

KUM TOHGON HO

LOLHINNA LE LOSAPNA

KBC Assembly C/C Kpi, 2018 phatsahna dungjujin Dr Colvin Academy mun chonding kiti chu Pathen lungset in MBC lamkai hotoh kihou-tohna akineijin, 15th February 2018 sung ngeijin akichaijin School Building akichondohtai. 16th Feb. In Thensona ki akimangin Invitees ho Ankong akiso khompuiuin, 18th Feb. Ni'n aphatcha'n Session jong akipanthei ngaltan, tunichan in phate cha'n amachal jinge. Hinlah amun lhatna dinga Houbung phabep a General fund muding kinepna a Share hung kihom chu 1/3 in bou ahinpe in, tuhin amun man thu ah akiboidentai. Lungset tah in Houbung akiminphah chengse'n kumlhun Audit kah hin hinpechek leuhen tohgon ho lolhing ding ahi.

Kanggui Christian College Infra-structure Upgrade bolna dinga Fund drive kibolna ah 1/2 in Positive Response ahinpehtheinau chungah Board in kipathu sangtah in akiphonge. Natoh jong akehleng akichallha theitai. Houbung hihen changval a hijong leh ngaichatna lekhathot mu a hinpeloulai hon kumlhun kah a ahinpehdiu kinepkina lentah pum in akingah jinge.

Christa thisan'a lhatdam kachankhompni KBC Houbung mite henga seinom chu ahileh Institution ineihou akhantouna/alolhinna ding hi eiho'a kingam ahijing in, kumtohgon ineihou suhbulhit a aumtheina dingin ipankhom u angaije ti hi sumillou dingin avel in ikitemuve.

LIST OF DONATION FOR KANGGUI CHRISTIAN COLLEGE - 2018

Receipt No.	Donar's Name & Address	Amount	Date
1551	Ngamjang Lhouvum, C/C Saparmeina	1,000=00	19/8/18
2	Letthang Haokip, Chassad Avenue (1)	6,000=00	21/8/18
3	C/C Molnoi Pallel (16)	14,000=00	6/9/18
4.	Khopijang Hb (11)	15,000=00	9/9/18
5.	Saisijang Hb (19)	6,000=00	17/9/18
6.	J.Lhanghoi Hb (4)	6,000=00	17/9/18
7.	C/C Salem village, Saparmeina	15,000=00	1/10/18
8.	Mr Paomin Kigen, Kpi (L) Seingam Kipgen Gangpijang	15,000=00	3/10/18
9.	Mr Thangboi Haokip, Zion Village, Pallel (16)	5,000=00	10/10/18
60	Mr Pagin Kipgen(Diamon School, Kpi (L) Thongkhomang)	14,000=00	3/10/18

1.	Mr Sehminthang Dennis Misao, Light house School Kpi	14,000=00	3/10/18
3.	Mr Lhunthang Mate, Chief of Zion Vill, Pallel(16)	5,000=00	10/10/18
4.	Hengbung Baptist church, Kpi Dist.	15,000=00	10/10/18
5.	Mr Thangjamang Khongsai, Gamnom Saparmeina	3,000=00	12/10/18
6.	Chassad Avenue B/Ch (1)	14,000=00	16/10/18
7.	Jamsei Haokip, Haokipveng Imphal	2,000=00	16/10/18
8.	Lunkholal Touthang, C/C Salem Saparmeina	6,000=00	20/10/18
9.	Gangpijang B/Ch (19)	6,000=00	23/10/18
70.	Haipi B/Ch (TBA)	5,000=00	23/10/18
1.	Kanggui Christian College, Kpi	15,000=00	27/10/18
2.	Saivom B/Ch (16)	6,000=00	30/10/18
3.	Ts Mangcha Leijangkhopi	14,000=00	9/11/18
4.	Apple Buds Academy, Ollim Sapermaina	5,000=00	12/11/18
5.	N.Songlung B/Ch (4)	6,000=00	12/11/18
6.	Pu M. Tilkhomang Haokip, New Lambulane	3,000=00	13/11/18
7.	Pu Mangkholet Haoki, Aigejang (16)	10,000=00	15/11/18
8.	C/C Salem Saikul, (3)	5,000=00	15/11/18
9.	Ms Avei Haokip, Old Lambulane	5,000=00	28/11/18
Total Rs			2,36,000=00

Note:- Aphatcha natoh ana kipatheilou hih in, tulhasung a hi kiboipi ding ahijeh in a hinpetheiloulai hon jong ageitai tina umloua ngailut leh khohsahna jal'a January,2019 chan a hinpeh thei ahijing nalaije.

Literature Column

SUNDAY SCHOOL TEACHERS TRAINING - 2019

Pakaiya tohkhompi gambih pastor, gamnbih lamakai ho, houbung lamkai ho, Sunday School Superintendent ho le jilkung ho jouse Christmas (2018) le kumthah (2019) chibai!

Ikiloikhom nau Kuki Baptist Convention sunga kumseh a ihinbol jingu le ihinchepi jingu bangin 2019 kum a Sunday School Teachers Training ding thua hetsahna annoiya bang hin ahung kipe e.

Amun	: Centre Church, Salem Sapormeina, KBC Gambih No. 4, Kangpokpi District.
Lhunkim ni	: 21st January (Monday), 2019.
Aphat sung	: 22nd - 23rd January (Tuesday - Wednesday), 2019
Kikhen ni	: 24th January (Thursday), 2019.

Traininga Hungpang Ding Mi Khat Chunga Sum/ Paisa Lutding Jat

1. Mess fee - Rs 500 + Registration fee Rs. 100, agom a mi khat a Rs. 600/- only
2. Sunday School la (Action song/ Choreography) CD khat man Rs. 100/- only.
3. Chele valena le khorsa/porsa a lut ding ho
4. Sunday school lam to kisai lekhabu phachom dang dang ho kichohna ding Sum hung kigingun

Alou Theilouva Training a Hungpang Dingho

1. Sunday School Superintendent ho jouse.
2. Superintendent umlouna hoa houbung Head deacon ahiloule ahithe khat.
3. Beginners a pat Pilhing Class chan a Sunday School jilking ho jouse. *(Gelkhoh tah le tomngai tah a hungpang tei din kigosoh kei ute)*

Manbeiya Muding ho 1. File cover 2. Note book 3. Pen

Hin Kipoh Dingho

Labu, Bible, Bedding/Janpon lum, von lum le nangma ngaichat thil ho.

Sapormeina Jotna

1. *Bus Parking : Naga Mapal ahiloule Khuyathong, Imphal. Phatah a seat nachannom le Naga Mapal a Public toilet kom a nangading.*
2. *Bus timing : Jinkah lang 7:00 am a pat nilhah lang 4:00 pm chan*
3. *Bus Bhara : Imphal to Sapormeina mi khat a Rs. 40/ Only*

Amun a kimanchahna ding achen achai (Detail Programme) ho aphot tengle amuna imudiu ahi.

HOUBUNG LA (TONIC SOLFA)

1. Phat sotpi inanga jingu Houbung La (Tonic Solfa) chu akitat tan, Christmas le New Year a kimanchana hoa Prize a choh dinga Christmas kon le KBC Book Room a imu thei diu ahitai. Aman Rs. 250/ Only. Bat a lah phal ahipoi.
2. Adei jousen ama ama dinga achoh chung chon a houbung jouse jong houbunga (Houbung Copy) dinga khat le ni/ idei jat jat u thonlou (Compulsory) a chotei dingin kigoh cheh ute.
3. Copy tampi akitat joupon, akichoh masa sa avangpha hijeng ding ahi.

KBC DIARY - 2019

Full time worker ho jouse, Elected Leader ho jouse, Gambih lamkai ho jouse, Houbung lamkai ho jouse le Houbung mite jousen ikichoh uva imanchah cheh diuvin KBC Diary -2019 akisemin, 2nd Week of December, 2019 a pat a muthei hiding ahitai. Aman Rs. 150/- only. Bat a lah phal ahipoi. Copy tampi akitat joupon, akichoh masa sa avangpha ahijenge.



KBC DIAMOND JUBILEE REPORT:

A. KBC Office Compound a kimmman chah naho:

Achesa nisim 15th November, 2018 (Thursday) nikho hin KBC Kum 60 Ihinna Diamond Jubilee chu KBC Office leh C/C New Lambulane a ana kimangin ahi. Rev. Sials Haokip makainan Jubilee Song chu Rev. Dr



Hawlngam Haokip, President in hondoh na aneiin, Central Choir hon Jubilee Lapi ngeitah in asaovin, Pu Lhunthang Kipgen Vice President

in KBC Ponlap khaidoh na aneijin, Pu Alun Haolai, Former President in Jubilee Balloon Ihadohna aneijin, chu in Jubilee Dahpi chupna Pastor, Secretary, Retired Pastor ho chuleh Jin-gun a kikou KCLF hole Jin-gun dang danghon aneijun, Rev, Dr Thongkhosei Haokip, General Secretary in KBC Ambulance Dk 10 Lacs man a choh dinga target inane uchu Ihandoh na aneijin tun akimang pantai. Rev. Henjalen Doungel makai na in Diamond Jubilee Hall Office maija indan chungu Jin-lhun in a mandinga Mission Board ho mopohna a Dk15 Lacs a kisa chu thensona kin Rev. SN Gangte, Former General Secretary in aneijin, chu in main Programme mang dingin mipi C/C New Lambulane Hou -in lam jonin akitol tai.

B. Celebration Programme at C/C New Lambulane a kimanchah naho:

Vaihom Rev. Kamboi Chongloi in ahung kikhom ho aban neichan phondoh na aneijin, Central Choir ho lamkainan Pathen vahchoi khomna akineijin, Thangkouna, Rev. Tonglet haokip in aneijin, Chonset phondoh na Pastor Henkholen Kipgen lamkainan simkhom na akineijin, Ngaidam thutep le thangvah na Pastor Onkho Haokip lamkai na mipin simkhom na akineijin, Rev. Onthang Haokip mipi ahung kikhom jouse Lemna thusei aneijin, Diamond Souvenir & Publicity ho lah a Pastor Onkho in Visual Presentation of KBC History chu Projector a konin mipi vetsah na aneijin, Rev. Tunlal Haokip a konin, KBC sunga aumta lou ngailut umtah Lamkai masaho geldoh na le ainsung mitea dinga taona amangin, Jubilee melchih na dinga Souvenir Committee hon tomngaitah a ahinsoh u chu, Rev. DT Haokip, Former General Secretary in thensona aneijin, KBC Kum 60 ahung lhintosh Ihon a KBC Motto a 'Service' kiti suh bulhit na dingin, Meithai, chaga, genthei te kithopina thei ding tohgong kinei Endowment Fund chu Rev. Dr Thongkhosei Haokip, General Secretary in Apa, Acha, Ihagao theng minin hondoh na aneitai. Jubille Lapi ngeitah chu Central Choir hoa konin akingailhan ahi.

Anoija chengho a konin Jubilee Greetings thupha ngeitah tah asei u akingai lhai, (1) MBC thalheng. Rev Boipu Serto houlim (2) KCLF thalheng Rev. LB Angam ahoulimin KCLF leh ECA minin kipa thilpeh in Belsa khat cheh jong KBC apeuvn ahi. (3) UCPI thalheng Rev. AK Goldsmit ahoulimin (4) TBCU thalheng Rev. Primal Kaipeng ahoulimin, (5) FMPB thalheng Rev. DK Sontak ahoulimin (6) CKWS hon Greetings ahinthot u chu Conduct pan simdohna aneijin,

Ng, Anem Haokip a konin Kipa thilpeh na, Rev. S Singson KBC Founderpa, Pu Lhunkhohen Kipgen KBC kiphudohna kho Haosapu, Jin-gun kikou ho, Jubilee Programme a Kin thempu a pangho, Host Church le

Planning Committee ho, Pu Tanglal Touthang Work Supervisor chuleh KBC thusim a dinga suhmil thei lou ho.KBC in boina lentah tah akito laija alung atha achiha ana toh a thingam a anapangho (1) (L) Pastor Letsei Chongloi, KBC thusimbu hi aman Motbung Centre a kon a ahinpohdoh jeh a tunia thusimbu ineithai u ahi. (2) (L) Pu Tongthang Haokip.(3) (L) Pu Ngamjapao Lupho (4) (L) Pu Letsei Haokip (5) (L) Pu Shonthong Haokip, amaho cheng mili hohi KBC kisumang thei lou ding ahi tia along toh ngam a anapang ho ahiuve. (6) (L) Pu K. Kipgen IAS amajal a tua Working Women Hostel hi kineithei ahi. (7) Pu Holkhomang Haokip, amajal a tua KBC Office Plot hi ineithei u ahije. Hiche jeh a chu KBC Kum 60 Ihin nia hi kigeldoh uva amaho umtahih jongleu Jana kipeuva ainsung mite thilpeh kipeu ahi.

Pastor Satminllen Khongsai lamkaina in Ps 145 hi mipi kilang lhah in simkhom na akineijin, Bible simphongna (OT) Pastor Mangcha Tuboi Kala 3:22-23, (NT) Mrs Lhingkhohoi Haokip in Lk 4:18 asimdo in, **Jubilee Thupi: 'A past to Remember, a Future to pursue'** (Kala 3:22-23, Lk 4:18) hiche Bible changa konin thupi ngeitah Rev. Dr Thongkhosei Haokip General Secretary in aseijin, kipeh lhah na la Central Choir hon asaovin, Jubilee Pledge simkhom nale kitepna mipin akineijin ahi. Kipa thuseina Ng, Anem Haokip in aneijin, Phat ho jouse khum kha na le mipi Ankong sokhom na dingin Rev. Thangsath Kipgen, Former Gen, Secy, in Pathen henga taona amangin Jubilee Programme chu lolhing tah in akichaitai.

KIPA THUSEINA:

Amasapenin KBC Kum 60 chan hinpui lhungpa Hatchung nung Pathen thangvah in umtahe. Chule KBC hung umdoh theina dinga lungle tha anaseng ho jouse chung a kiap thu akiseije.Jubilee Programme a minchongho, Speker Rev.Dr Thongkhosei Haokip, General Secretary, Songhon na a Minister a pang Rev.Dr Hawingam Haokip President, KBC Ponlap khaidoh Pu Lhunthang Kipgen Vice President, Balloon lhadoh a pang Pu Alun Haolai Former President, Ambulance thenso a pang, General Secretary,KBC, Jubilee Hall thenso a pang Rev. SN Gangte, Former Gen, Secy, Souvenir thenso Rev. DT Haokip Former Gen, Secy, Jubilee Dahchum a pang jouse, Jubilee Planning Committee ho jouse chung a kiap thu akiseije.

Office Renovation a dinga Worker ho sumle pai hintoh doh ho jouse chung a kiap thu akiseije. Office a Reception cum Waiting Lounge semna ding Rs 2.Lakha hintoh doh a KBC C/C Salem Sapormeina Houbung

mite chung a kipathu akiseije, Chule Waiting Launge nomtah a kichol don na ding a Arm bench(Sofa set) 4 khat a Rs 15,000/- each hintoh a (1) C/C B.Vengnom, (20 C/C Tuibong. (3) C/C S.Kanan Veng . (4) C/C Hill Town, nangho jouse chung a jong kipa thu akiseije. Guest House neidoh theina ding a lungle tha chule paisa Dk 15 Lacs hin podoh Mission Board ho jouse chung a kipa thu akiseije. KBC in Ambulance neidoh



theina ding a Dk 10 Lacs target kibol na a lungle tha hintoh a Planning Committee ho le Houbung , Dept, chule mimal cheh a sumle pai hintoh doh a choh doh a aumthei tah jeh in nangho jouse chung a kipa thu akiseije. Centre Church Kangpokpi in Urinal semna ding a pan ahin lahnau chung ah kipathu akiseije. KBC C/C New Lambulane Pastorpa le atoh khompi Deacon Board chule Houbung mipi te neh leh chah ding sem na a jan imulouva pan eilah peh u lhacha jouse le Usher ho le alam lam a mo eipoh peh hou jouse chung a kipathu akiseije. Jubilee Record umtheina ding a lungle tha hinsenga hinsemdoh Sovenir Committee ho chung a kipathu akiseijin, chule Rev. Dr Thongkhosei Haokip le anaoten aumtalou Pu Onkholet Haokip, apen na apao u ngailutna jalla apa min'a Souvenir eitapeh jeh un achunguva kipa thu akiseije. Jubilee Finance Committee chung a jong Lottery lolhingtah a ahinbol doh jeh un kipathu akiseije. Jubilee jemhoi ding a Pathen vahchoina Jubilee Lapisa le pan nathei chan a hungpang Centre Choir member ho chung a kipathu akiseije. Gift jouse eipoh doh peh u KBC Women Department chung a jong kipathu akiseije. Ani khoa mipi KBC apat New Lambulane chan mipi chele na ding a Bus eitopeh uva chule boina aumlouna ding a Security phatah a eihinsol peh u Pu Christopher le ainsung mite chung a kipa thu akiseije. Rev. Silas Boipu Haokip le atoh khompi STS Oja hon Jubilee Liturgical Manual kitup tah a ahinsem doh jeh un achung cheh uva kipa thu sangtah in akiseije. Programme minchong ho jouse chung a kipa thu sangtah in akiseije.

Office Building Compound semhoi na dinga atha ajung hinsengapan la ho:

- Office Staff ho jouse Supervisor Pu Thanglal Touthang lamkain na
- Compound sunga cheng Family ho le Hostel nungah ho
- STS Ojaho le Student ho jouse
- KBC Gambih No. 1 sunga Houbung tin a Pate ho
- HQF Gollhang ho chule adang dangho jouse chungaseijoulou kipathu akiseije.

Secretaries Tour Report

Kumsung a Secretary hon gambih sung tanglou va ahung kivil jing tolhonin KBC Secretaries tour achaina pen achesa 24th Nov.2018 nin Gambih no 20 Bongmol Area vil na agakinei jin ahi.

Gambih le houbung lamkai hon kipah tahin eina lamtou vin Gambih Centre Bongmol la kikhop khompi na eina neiun ahi. Lamkai mi 20 lam akikhom doh in kipah tah in lungel akisei khom in ahi.



Amahon aseinao vah KBC Gambih no 20 hi gambih neocha, phatjouse a hahsatnale genthei na hintoh jing gambih ahin, tujenga jong kichol-do lou lai gambih ahi atiuvin ahi. Masanga Gambih Centre Sita kho-sunga ananei laiuva gambih property tampi jong Sita houbung KBC a kon apot doh phat in athah tah in office thil le lo akilam phat kit taovin office jeng jong kisah jou lou vin genthei tah in akivaihom un ahi.

Pathen jallin ngailut naneitah in eina lamtou vin kihoulimna akinei jin program lolhing tah in akichai tan ahi.

***Muntin a um Houbung mite jouse
I Pakai u Jesu Christa pen
Kipana Christmas 2018
leh ahung lhung ding***

***Kum thah 2019
vangbohna changchah ding in
Kuki Baptist Convention
Head Office akon in Chibai.***



KIPA THU SEINA



Achesa nisim 4-8-2015 kum'a Pathen goupeh laigilga naosen pengkop thum kaneina chung a ikiloikhom nao KBC Thuso a taona ngaichat ana kithum toh kilhon in Pathen jallin chapang ho jong kum thum(3) ahung lhing taovin Pathen loupina chang taken. Hallelujah Amen. Hiche toh kilhonin Imphal JN Hospital a naosen thum lah aneopenpa Master Paogunsei akeng kijen pen jong Pathen lungset in tuhin lamjot thei leh kengkoh butthei in ahung umdoh theitan Pathen kathangvah e. Chuleh muntin a um sopi ulenao, sumle pai hihen taona hijongle eikithopi ho jouse chung a insung miten hiche KBC Thuso mangchan kipathu seijoulou nachung cheh uvah Pakai minin kahinphonguve, Pathenin phatthei naboh cheh tao hen. Kakipah uve.

Naosen pengkop ho min:

- | | |
|---------------|-------------------------------|
| 1. Paogunsang | Keima, |
| 2. Lamjemhoi | Pa Thangboi Vaiphei (Apa) |
| 3. Paogunsei | Nu Tinnu Vaiphei (Anu) |
| | MBC Town Church, Gambih no.15 |

KBC NO. 6 Chate Camp Lolhing tah a kichaita.



Pathen mapui a jallin Nisim 18—21 Oct. Sung in Govajang KBC NO. 6 Chate Camp Lolhing tah a kichaita. Pathen mapui a jallin Nisim 18—21 Oct. Sung in Govajang Houbung Mun a Gambih Chate Camp lolhing tah in Ana kinei in ahi. Tuchung Chate Camp a Gambih sunga Chate kum 10 apat chung lam mi 180 lam kaikhom doh in chuleh Camp lolhinna dinga Camp Speaker a eipanpeh u Evan. Chingboi, Pastor Thongkhongam leh Pastor Henkhomang chuleh Rs. 20000 a eihin kithopiu Convention Women Department chung a seijoulou kipa thu kaphongun ahi. Gambih a Houbung ho hi hen mimal a hijong leh Sum le pai, tha le Jong chuleh Taona a pan hinla ho jouse chung a Jong kakipanau kahin phong uve.

Mrs. Chinlam Haokip
Chairperson Women Dept.
KBC No. 6.

Mrs. Lamchin Kipgen
Secy. Women Dept.
KBC No. 6

HAOSA HO LEH DEACON HO CAMP

Theme : "Aw Pakai kagam sung u damsah un" (Heal our land)
2nd Chronicle 7:14

Chunga kipe thupi " Aw Pakai kagamsung damsah un" ti mangchan Kuki Baptist Convention No.7 ten nisim 21- 23 November, 2108 sungin Haosa ho leh Deacon ho camp Khoken Baptist Church muna akinei in, lolhing tah in akichaitai.

Hiche campsunga speaker leh resource person chuleh Artiste a eipanpeh hou:

Rev. Dr. M. Thongkhosei Haokip, General secretary KBC

Rev. Demkhonah Doungel

Pu DP Haokip IRS, Principal commissioner Income Tax Department Govt. Of India

Pu P. Doungel, ADGP Government of Manipur

Rev. Lamkeng Lhouvum Gambih Pastor KBC No.7

Gl. Jajai singsit



Rev. Doungel in Daniel bung 5 sunga konin tena (measurement) thum mangchan houlim na aneijin, Pu DP Haokip in Nehemiah bung 3 sunga Zerusalem kelkot (Gate) som kismphat nathu leh ama testimony chuleh Bible simlou akhohdan thua houlimna amang in ahi.

Rev. Dr. M. Thongkhosei in KBC doi le tup chuleh kivaipohna thu asei in, Pu P. Doungel IPS in ama testimony chuleh taona leh ngai-lutna thua tilkhouna aneijin chuleh Rev. Lamkeng Lhouvum in Devotion lamkaina aneijin ahi.

Hiche camp sunga Haosa le village Authority thalheng 36 chuleh Houbung lamkai 35 leh Gambih lamkai 12 agoma 83 ahung kik-homdoh in ahi.

Hiche camp sunga akigelkhoh penchu Haosa ho leh Houbung lamkai ho kithokhom'a kho le veng chuleh Houbung iti khantousah ding ham ti thua kitilkhouna akineijin ahi. Chuti chun achaina keijin Hoasa Upa leh lamkai ho mi somthum vellin Bible cover to cover 2019 kumsunga simpan dingin kilhan na anei uvin ahi. Pu Athang Haokip chief of S.Saheibung in tua pat a vang gamsunga kikhelna umteijinte tin akinepna thu aseijin chuleh hitabang camp hi nam-sung a amasapen ahitoh lhona gambih lamkai ho chuleh Pastor pa chung a pachatna sangtah aphonh doh in ahi.

Tuchung camp lolhina dinga sum le pai a hungpang doners ho, tha le junga pan hinla Khoken Baptist Church (host church) chuleh speaker, Artiste chuleh delegates ho jouse chung a Gambih thalheng in kipathu ahung kiphonge. Gamsung kikhel nading leh lamkai mopo ho hatjing thei nadin Pathen in KBC No.7 phatthei bohjin taheh

(Haokhongam Haokip)
Chairman, KBC No.7

(Lalkhohao Lotzem)
Secretary, KBC No.7

Tujang Baptist Church Hou-Inn thah KITHENSO

Achesa nisim 20, Oct. 2018 nin phat sot thim pi lut a ana kisa Tujang Baptist Church Hou-Inn thah chu Pathen lungset nale mapu-ina jalla sahchai ahi toh lhon in, Pastor Khupjoyful singson, Pastor KBC No. 13 Kin-Thempu hina in thensona le hondohna ana ki neitan ahi. Hou-Inn sahna a sum le pai chule tha le jung a eina panpi hou le anikho'a gelkhohna nei tah a kinna eihung lhah peh ho'u jouse chung ah Board of Deacons in kipa thu kahin phong uve. Pathen in na tohphat nau chung ah phatthei naboh cheh tauhen.

Seiminthang Touthang.
Head Deacon Tujang B/C

Thangkhanlal Mate
Secy. Tujang B/C

CONDOLANCE

REV. DR. YAM KHO PAU HAOKIP UM TALOU

29th November 2018



Achesa nisim 25 Pakai nikho chun Rev Dr Yam Kho Pau Haokip, tumajep a Myanmar Baptist Convention (MBC) ah General Secretary (GS) chu ana um tapoi. Amahi India leh Myanmar gama Kukite a dinga hou lamkai len loitah ahi. Amahi leiset chung (international) level a lamkai hetthei tah khat ahina chu, World Council of Churches (WCC) a Central Committee member khat ahi.

Myanmar Baptist Convention General Secretary a atoh masang chun, Myanmar Council of Churches (MCC) ah Associate General Secretary and Executive Secretary for Human Resources Development ah anatonge. Tohmun leh mopohna adang dang anapoh ho chu, Theological Education of Myanmar (ATEM), Myanmar Institute of Theology (MIT), National Leprosy Mission of Myanmar, and the Kuki Chin Baptist Association (KCBA) ahiuve. Pu Dr. Yam Kho Pau vin MBC a General Secretary hi kum 6 ana tonge, tichu 2011 to 2017 sung ahi.

Eiho Kuki Baptist Centenary 2014 kuma Tujangwaichong a inaman u chun ama thusei khat in ana pange. Kuki ngailutah chuleh Baptist ho lamkai phatah ahi. Amahin chapa 2 leh chanu 2 melhoi tahtah Nem Nei Them, Let Gou Min, Than Pi Mang chuleh Nem Nei Sing adalhan ahi. Ainneipi Pi Hat Kho Neng in achesa 2016 kum chun anadalha in, chujou kum 2 lhin ding nikho khat kivat a ama jong alei hinkho anabei ahi.

Ama umlouhi Kukite a dinga mi pamaitah ahin, aumlouhi aitih a aonglai suhdim ding umlou khat chu ahi. Insung mite lunghemna ah KBC in jong kahin lunghem piuve. Pathenin adalhah insung mite lhamonna pe tauhen lang, ama jong alhagao lungmongin choldo taken.

Rev. Dr. M. Thongkhosei Haokip
General Secretary, KBC.

Assam a Amrajan KBC Mission Hostel leh Arunachal Danglat B/Church kithensona



Post Regd. MNP/81
Regd No. 18134/88



KBC Diamond Jubilee song honna a Central Choir Lapi sahpet

If undelivered, please return to

The Editor. KBC Thuso

KUKI BAPTIST CONVENTION

Opp. DM College, Imphal - 795 001

Contact: 9862633173